

De Hausbode

Die junge Leit heitzutach, iwerhauptscht die, die in der Stadt lewe, kenne sich mit Sicherheit gar nit vorstelle, wie des uf em Hausbode in de Derfer frieher ausgschaut hat. Wann mer die Tier zum Bode ufgemacht hat, do war zuerscht die so genennte Bodemstrapp. Zu rechter Hand war e Stellasch mit Kischtle, in dene es notwendschti Werkzeug (Hammer, Zang, Feile, Fuchsschwanz, Beil, Nägl un sunschtiches) sei Platz ghat hat. Do hat awer ach es Kerwl gstann for die Aijer aushewe un e anres Kerwl mit Kukrutzkheere for die Hingle, Gäns un Ente fiedre. Do han ach die gflochtene Sträng mit Knowl ghong. Zu linker Hand ware dann die Holztrappe un de Strick, an dem mer sich anghal hat, wann mer nuf uf de Bode nuf gang is.

Die Bode war in zwaa geteelt un in der Mitt war vun eem zum anre End e freie Wech, dass mer sich halt alles holle hat kenne, was mer gebraucht hat. Uf eener Seit ware die Mehlkischt, Schlachtmulder un –tisch (mit Schab- un Kesslleffle, großi Messre sowie Klowe-Hokscher), großi Weidlinge, Backtroch. Noh is de Rachfang kumm, in dem mer Worscht, Schunge un Speck noh em Insalze zum Raache ufghong hat. Derhinnert de geriwelte Kukrutz un e Stellasch mit leeri Dunschtgläser un Flasche (greesri un klenneri aus Glas).

Uf der anri Seit war gleich newer de Trappe e Schubladschank. In dem sin die Hefter un Biecher vun de Schulkinner ufbewahrt gin. Ach Note- un Stammbiecher. Alles war scheen uf Johrgäng sortiert. Ich han in spätre Johre immer stark gheere in dem Schubladschank Erinnerung gsucht un ach gfunn. Gschmunzelt han ich, wann ich in de Schulbiecher geblättert un verschiedene Gekrikseltes gsiehn han. Die Stammbiecher/Andenkenhefter han mich an die Schulkumrade erinnert.

Newedran e Kredenz mit allerhand Gscherr, des wu nit im alltägliche Gebrauch oder uralt war. Dann ware Stricke gspannt, for die Wäsch im Winter zum Truckle ufhänge. Wann e kalte Winter war, is die sogar stark gfror un hat in der Stub ufgelaant gin misse.

Dann war e aldes Tuch ausgebreet, dorte druf ware die Zwiwle iwer Winter, scheen mit eem alde Teppich zugedeckt, dass se jo nit gfriere selle. Uf dere Seit war dann ach die Frucht, sie hat zeitweis umgschipt misse were, des war so e Art Lifte.

Links un rechts vum freie Mittelwech ware Holzbalke, uf dene han dann Säck gelee, die angfillt ware mit Frucht oder Kukrutz, gericht for in die Miehl fiehre.

Ganz vore geger die Gass ware die Bodefinschtre – Bodeluck genennt. Mir hat jo ach de Hausbode lifte misse. Un een Mol im Jahr is der ach ufgewäscht gin – mit Misch von de Viecher, in Wasser ufgeleest.